



## ইউনিট ৮ পত্রলিখন



### উদ্দেশ্য

এই পাঠটি পড়া শেষে আপনি-

- পত্রের প্রকাভেদ বলতে পারবেন।
- বিভিন্ন প্রকার পত্র লিখতে পারবেন।



### মূলপাঠ

যোগাযোগের জন্য পত্রলিখনের প্রয়োজনীয়তা রয়েছে। বিশেষ করে, দূরবর্তী কারো সঙ্গে যোগাযোগের জন্য এই পত্রলিখন দরকার। দৈনন্দিন জীবনে কাজকর্ম সম্পাদনের জন্য পত্রলিখন তাই অপরিহার্য। শুধু তাই নয়, পত্রলিখন- বিশেষত ব্যক্তিগত পত্র- ব্যক্তির ব্যক্তিগত আবেগ-অনুভূতিকে ধারণ করে বলে অনেক সময় এর একটি সাহিত্যমূল্যও তৈরি হয়। উদাহরণ হিসেবে উল্লেখ করা যায় রবীন্দ্রনাথ ঠাকুরের পত্রাবলি।

### পত্রের প্রকারভেদ

সাধারণভাবে চিঠিপত্র চার ধরনের-

১. ব্যক্তিগত পত্র
২. সামাজিক পত্র
৩. ব্যবহারিক বা বৈষয়িক পত্র
৪. বাণিজ্যিক বা ব্যবহারিক পত্র

একেক ধরনের চিঠির কাঠামো একেক প্রকার।

চিঠি লেখার কিছু সাধারণ নিয়ম-

১. চিঠির ভাষা হবে আকর্ষণীয়, প্রাঞ্জল ও সহজে বোধগম্য।
২. শুদ্ধ বানানে, সঠিক বাক্যে ও সুন্দর হস্তাক্ষরে চিঠি লিখিত হওয়া বাঞ্ছনীয়।
৩. চিঠি মূল বক্তব্যকে ঘিরে লিখিত হবে; বাহুল্য বা অতিরঞ্জন পরিত্যাজ্য।
৪. কাঠামো মেনে চিঠি রচনা করতে হবে এবং খামে প্রেরক ও প্রাপকের পূর্ণ ঠিকানা সুস্পষ্টভাবে লিখতে হবে।
৫. পত্রিকায় প্রকাশের চিঠির দুটো অংশ- একটি মূল চিঠি, অপরটি সম্পাদকের প্রতি ছাপানোর অনুরোধ।
৬. স্মারকলিপিতে সব সময় 'আপনি' সম্বোধন ব্যবহার করতে হয়।

### ১. ব্যক্তিগত পত্র :

সাধারণত ব্যক্তিগত প্রয়োজনে অথবা ব্যক্তিগত ধ্যান-ধারণা, চিন্তা-ভাবনা, আবেগ-অনুভূতি প্রকাশের তাগিদে মানুষ আপন পরিবার-পরিজন, বন্ধু-স্বজন বা পরিচিতজনের কাছে চিঠি লিখে থাকেন। এই ধরনের ব্যক্তিগত ভাবনা তাড়িত চিঠিই ব্যক্তিগত চিঠি হিসেবে চিহ্নিত।

প্রচলিত কাঠামোতে ব্যক্তিগত চিঠির পাঁচটি অংশ। সেগুলো হচ্ছে--

- (১) ঠিকানা ও তারিখ
- (২) সম্ভাষণ
- (৩) মূলপত্র
- (৪) বিদায় সম্ভাষণ
- (৫) স্বাক্ষর



(১) ঠিকানা ও তারিখ : পত্রের বামদিকের ওপরের অংশে প্রথমে পত্রলেখকের পূর্ণ ঠিকানা ও তার নিচে তারিখ লিখতে হয়। যেমন :

৫০/১, নর্থ রোড

ঢাকা-১২০৫

১৫ সেপ্টেম্বর, ২০১৬ অথবা,

গ্রাম- ভূরবুড়িয়া

ডাক- পুটিয়া বাজার

জেলা- নরসিংদী

২৬ আগস্ট, ২০১৬খ্রি.

(২) সম্ভাষণ : যাকে উদ্দেশ্য করে চিঠিটি লেখা হচ্ছে তার সম্মান, মর্যাদা ও পত্রলেখকের সঙ্গে তার সম্পর্কের নিরিখে সম্ভাষণসূচক শব্দ ব্যবহার করতে হয়। আর সম্ভাষণ লিখতে হয় পত্রের বামদিকে ঠিকানার পরের ধাপে। যেমন :

পরম শ্রদ্ধাভাজনেষু/শ্রদ্ধেয় আব্বা/প্রিয় সুলতান/স্নেহাস্পদ রাসেল/সুজনেষু ইত্যাদি।

(৩) মূলপত্র : এটিই চিঠির মূল অংশ। এ অংশে পত্রলেখক তার বক্তব্যকে সুন্দর করে গুছিয়ে প্রাঞ্জল ভাষায় উপস্থাপন করবে। একই পত্রে একাধিক বক্তব্য থাকলে তা আলাদা আলাদা অনুচ্ছেদে লিখতে হবে।

(৪) বিদায় সম্ভাষণ : মূলপত্রের পরের ধাপে পত্রের বামদিকে বিদায় সম্ভাষণ লিখতে হয়। পত্রপ্রাপকের সঙ্গে সম্পর্কের নিরিখে বিদায় সম্ভাষণসূচক শব্দ ব্যবহার করতে হবে। যেমন :

ইতি, আপনার স্নেহাস্পদ/ স্নেহধন্য

ইতি, প্রীতিমুগ্ধ/ প্রিয় বান্ধব

ইতি, তোমার মঙ্গলপ্রার্থী

ইতি, বিনীত ইত্যাদি।

(৫) স্বাক্ষর : এটি চিঠির শেষ অংশ। এখানে পত্রলেখকের পুরো নাম বা প্রচলিত মুদ্রাকৃতি ব্যবহার করা যায়।

চিঠি প্রাপকের কাছে পৌঁছলেই এর সার্থকতা। প্রাপকের কাছে পৌঁছানোর জন্য খাম ব্যবহার করতে হয় এবং খামের ডানদিকে প্রাপকের ও বামদিকে প্রেরকের পূর্ণ ঠিকানা লিখতে হয়। নিম্নে একটি চিঠির পূর্ণ কাঠামো উপস্থাপিত হলো –

(১) তারিখ ও ঠিকানা

(২) সম্ভাষণ

(৩) মূলপত্র

(৪) বিদায় সম্ভাষণ

(৫) স্বাক্ষর

|                          |                          |
|--------------------------|--------------------------|
| স্ট্যাম্প                |                          |
| প্রেরক,<br>নাম<br>ঠিকানা | প্রাপক,<br>নাম<br>ঠিকানা |



## ব্যক্তিগত পত্র

### ১. পিতার নিকট পুত্রের পত্র

০৩ জুলাই ২০১৭

ঢাকা

শ্রদ্ধেয় আব্বা,

আমার সালাম নিবেন। আম্মাকেও আমার সালাম জানাবেন।

কয়েকদিন যাবত আপনাদের কথা খুব মনে পড়ছিল। গতকাল আপনার চিঠি পেয়ে মনটা ভাল হয়ে গেল। চিঠিতে জানতে পারলাম আপনি আমার ষাণ্মাষিক পরীক্ষার ফলাফল নিয়ে বেশ চিন্তিত আছেন। আপনি শুনে খুশি হবেন যে, আমি ষাণ্মাষিক পরীক্ষায় প্রতিটি বিষয়ে A+নম্বর পেয়ে পাশ করেছি। হোস্টেলে আমার বন্ধুরাও খুব ভাল ফল করেছে। আমার জন্য চিন্তা করবেন না। আমি নিয়মিত পড়াশুনা করছি। আশা করি বার্ষিক পরীক্ষাতেও অনেক ভাল করব। আপনি ও আম্মা আমার জন্য দোয়া করবেন। আমি ভাল আছি। আপনার শরীরের প্রতি যত্ন নিবেন।

টুম্পা মণিকে আমার আদর দিবেন।

ইতি

আপনার স্নেহের

সজীব

|                                             |                                                                                       |           |
|---------------------------------------------|---------------------------------------------------------------------------------------|-----------|
| প্রেরক<br>সজীব<br>আইডিয়েল হাই স্কুল, ঢাকা। | প্রাপক,<br>নাম : ফজলুল হক<br>গ্রাম : হোসেনপুর<br>পোস্ট : হোসেনপুর<br>জেলা : কিশোরগঞ্জ | ডাক টিকেট |
|---------------------------------------------|---------------------------------------------------------------------------------------|-----------|

### ২. আপনার জীবনের লক্ষ্য ও উদ্দেশ্য জানিয়ে আপনার বাবার নিকট নিকট একটি পত্র লিখুন।

২২ জুন ২০১৭

ঢাকা

শ্রদ্ধেয় বাবা,

আমার সালাম নেবেন। মাকেও আমার সালাম জানাবেন। ছোট ভাই দীপুর জন্য আমার আদর রইল।

গতকাল আপনার চিঠি পেয়েছি। চিঠিতে আপনি আমার জীবনের লক্ষ্য ও উদ্দেশ্য জানতে চেয়েছেন। আপনি তো জানেন আমি এস.এস.সি পরীক্ষায় গোল্ডেন A+পেয়ে পাশ করার চেষ্টা করছি। তাই মেডিক্যাল কলেজে পড়ার আমার খুব ইচ্ছা। ভবিষ্যতে আমি একজন ভাল ডাক্তার হতে চাই। আমাদের দেশে কত গরিব লোক সু-চিকিৎসার অভাবে মারা যাচ্ছে। তাই আমি ডাক্তার হয়ে গরিব দুঃখী মানুষের পাশে দাঁড়াতে চাই। আমি গ্রামের মানুষের সেবা করতে চাই। ডাক্তারী পেশার মাধ্যমে আমি আমার গ্রামের অসহায় মানুষের মুখে হাসি ফোটাতে চাই। এটাই আমার স্বপ্ন। আপনি ও মা আমার জন্য প্রাণভরে দোয়া করবেন। আশা করি আমি আমার স্বপ্ন সার্থক করতে পারব। আমার জন্য চিন্তা করবেন না। হোস্টেলে আমি নিয়মিত পড়াশুনা করছি।

দীপন আপুকে আমার সালাম দিবেন। আপনাদের কুশল সংবাদ জানিয়ে আমাকে চিঠি দিবেন। আপনারা ভালো থাকুন, সুস্থ থাকুন- এই কামনা করি।

ইতি

আপনার স্নেহের

শ্যামা

|                                 |                                                                                        |           |
|---------------------------------|----------------------------------------------------------------------------------------|-----------|
| প্রেরক<br>শ্যামা হোসেন<br>ঢাকা। | প্রাপক,<br>নাম : বেলাল হোসেন<br>গ্রাম : চরগ্রাম<br>পোস্ট : নগরবাড়ী<br>জেলা : জামালপুর | ডাক টিকেট |
|---------------------------------|----------------------------------------------------------------------------------------|-----------|



৩. আপনার দেখা একটি বিজ্ঞান মেলায় বর্ণনা দিয়ে বন্ধু/বান্ধবীকে একটি পত্র লিখুন।

২০ নভেম্বর ২০১৬

শ্যামপাড়া, কুষ্টিয়া

প্রিয় লিলি,

আমার শুভেচ্ছা নিও। অনেকদিন পর তোমার চিঠি পেয়ে মনটা আনন্দে ভরে ওঠল। কয়েকদিন যাবত অনেক ব্যস্ততার মাঝে দিন কাটাচ্ছি। আজ তিনদিন ধরে আমাদের স্কুলে বিজ্ঞান মেলা চলছে। মেলার সার্বিক ব্যবস্থাপনার দায়িত্বটা আমার উপরই ছিল। তাই বুঝতেই পারছি, এ নিয়ে আমাদের কত কর্মব্যস্ততা, কত আনন্দ-উল্লাস।

এ মেলাকে সুন্দর ও সার্থক করার জন্য আমাদের উপ-কমিটির সব সদস্য ও বিজ্ঞান শিক্ষকদের চেষ্টার কোন ত্রুটি ছিল না। আমাদের স্কুলের ক্ষুদ্রে বিজ্ঞানীরা এমন সব প্রজেক্ট দিয়ে স্টল সাজিয়েছিল যা দেখে তুমি সত্যি অবাক হয়ে যেতে। এসব ক্ষুদ্রে বিজ্ঞানীদের তৈরি 'চার্জ লাইট', 'সৌর বিদ্যুৎ', 'গ্রীনহাউজ ইফেক্ট', 'এয়ারকুলার' ইত্যাদি প্রজেক্ট দিয়ে তৈরি স্টলগুলো ছিল সবার আকর্ষণীয়। সারাদিন স্কুলের ছেলে-মেয়ে আর অভিভাবকদের সমাগমে বিজ্ঞান মেলায় ছিল এক উৎসব মুখর পরিবেশ। সমাপনী দিনে স্কুলের প্রধান শিক্ষক সহ ম্যানেজিং কমিটির সকল সদস্য বিভিন্ন স্টল ঘুরে ঘুরে দেখেন। তাছাড়া বিভিন্ন ক্ষুদ্রে বিজ্ঞানীদেরকে পুরস্কৃত করেন। সত্যিই বিজ্ঞান মেলা যে এত মনোরম হতে পারে তা ছিল আমার কল্পনাতীত। আমার জীবনের স্মৃতিতে এ তিনটি দিন চিরস্মরণীয় হয়ে থাকবে।

আজ আর নয়। তুমি ভাল থেকে। তোমার আকাশ-আম্মাকে আমার সালাম দিও এবং ছোট ভাই পিন্টুকে শুভেচ্ছা।

ইতি

তোমার বন্ধু

আকাশ নীলা

|                                           |                                                                           |
|-------------------------------------------|---------------------------------------------------------------------------|
| ডাক টিকেট                                 |                                                                           |
| প্রেরক,<br>লিলি<br>শ্যামপাড়া, কুষ্টিয়া। | প্রাপক,<br>নাম : নীলা<br>গ্রাম : রৌমারি<br>ডাকঘর : রৌমারি<br>জেলা : রংপুর |



৪. একটি দুর্ঘটনা বা স্মরণীয় ঘটনার বর্ণনা দিয়ে বন্ধুকে পত্র লিখুন।

১০ আগস্ট ২০১৬

উত্তরা, ঢাকা।

প্রিয় মহসিন,

আমার প্রীতি ও শুভেচ্ছা রইল। আজ আমার মনটা ভাল নেই। চোখে ভাসছে শুধু যন্ত্রণাময় এক দুঃসহ স্মৃতি। আজ তোমাকে আমার চোখে দেখা এক দুর্ঘটনার বর্ণনা দিচ্ছি।

ঈদের ছুটিতে ট্রেনে আমি আবু-আম্মুসহ গ্রামের বাড়িতে যাচ্ছিলাম। তখন বেলা এগারটা, ট্রেন দ্রুতগতিতে ছুটে চলছিল। হঠাৎ এক যুবক মোবাইলে কথা বলতে বলতে রেললাইন পার হতে যাচ্ছিল। মুহূর্তেই সব শেষ। গাড়ীর নীচে যুবকটির মাথা কাটা গেল। একটু দূরে গিয়ে ট্রেনটি থামল। আমি নেমে এসে সব দেখলাম। যুবকটির মাথা ছিটকে পড়ে আছে। রক্তে চারপাশ লাল হয়ে আছে। কিছুক্ষণের মধ্যেই লোকজন এসে ভীড় জমাল। এমন বীভৎস দৃশ্য এর আগে আমি কখনও দেখিনি। ছেলেটির জন্য আমার অসম্ভব মায়া হতে লাগল। একটু সতর্ক হলে হয়তো তাকে জীবন দিতে হতো না। এই দুঃসহ স্মৃতি কিছুতেই আমার মন থেকে মুছে ফেলতে পারব না। সামান্য ভুলে এরকম মর্মান্তিক মৃত্যু আমার জীবনে চিরস্মরণীয় হয়ে থাকবে। এ দুর্ঘটনা থেকে এ শিক্ষাও পেয়েছি মোবাইল ফোনে কথা বলতে বলতে কখনও রাস্তা পারাপার হওয়া উচিত নয়। তুমিও কখনও এরকম ঝুঁকি নিয়ে চলাফেরা করবে না।

আজ আর নয়। তুমি ভালো থেকে। তোমার আব্বা-আম্মাকে আমার সালাম দিও।

ইতি

তোমার বন্ধু

যাকের

|                                                 |                                                                                           |
|-------------------------------------------------|-------------------------------------------------------------------------------------------|
| ডাক টিকেট                                       |                                                                                           |
| প্রেরক,<br>নাম : যাকের<br>ঠিকানা : উত্তরা, ঢাকা | প্রাপক,<br>নাম : মসসিন<br>গ্রাম : বড়াই গ্রাম<br>ডাকঘর : কড়াই গ্রাম<br>জেলা : কুড়িগ্রাম |



৫. বন্ধুর পিতৃবিয়োগে সান্তুনা দিয়ে পত্র লিখুন।

০২ মে ২০১৬

ঢাকা

প্রিয় শোভন,

প্রীতি ও শুভেচ্ছা রইল। গতকাল তোমার চিঠি পেয়ে মনটা খুব খারাপ লাগছে। চিঠিতে তোমার বাবার হঠাৎ মৃত্যুর সংবাদ আমাকে বেশ মর্মান্বিত করেছে। দোয়া করি স্বজন হারানোর এ ব্যথা তুমি সহ্যে পার।

চিঠিতে জানতে পারলাম, ডেঙ্গুজ্বরে চাচা মারা গেছেন। তিনি যে এত অল্প সময়ে আমাদের ছেড়ে চলে যাবেন তা ভাবতে পারিনি। তিনি আমাকে কতো স্নেহ করতেন। তিনি আমাকে সবসময় অনেক উপদেশ দিতেন। তাঁর হাসিমাখা মুখখানা সর্বদাই আমার চোখে ভাসছে। আমার চোখের জল বাধা মানছে না। কিন্তু করার কিছুই নেই। কারণ সবাইকে একদিন মৃত্যুর স্বাদ গ্রহণ করতে হবে। তাই আমাদের সকলকে এ বিপদের দিনে ধৈর্য ধারণ করতে হবে। মনে রেখো, কারো বাবা চিরকাল বেঁচে থাকে না। এটাই বাস্তবতা, এটাই চরম সত্য। তোমার উপর এখন অনেক দায়িত্ব- এ কথা মাথায় রেখে নিষ্ঠার সঙ্গে তুমি তোমার কর্তব্য পালন করবে। পড়াশুনায় আরো বেশি মনোযোগী হতে হবে, যাতে একদিন মাথা উঁচু করে দাঁড়াতে পার। তাই তুমি সব দুঃখ-বেদনা অতিক্রম করে ধৈর্য ধারণ কর- এটাই আমার কামনা। তুমি ভাল থেকো।

তোমার মাকে আমার সালামও কনাকে স্নেহ জানিও। দোয়া করি, তোমার বাবার বিদেহী আত্মা যেন শান্তি পায়।

ইতি

তোমার বন্ধু

সোহেল

| ডাক টিকেট                                              |                                                               |
|--------------------------------------------------------|---------------------------------------------------------------|
| প্রেরক,<br>সোহেল হোসেন<br>৪২, বড় বাজার<br>ঢাকা- ১২১০। | প্রাপক,<br>নাম : শোভন চৌধুরী<br>২/৩ স্টেশন রোড<br>খুলনা- ৩১৩২ |



## আবেদনপত্র বা দরখাস্ত

১.বিদ্যালয়ে অনুপস্থিতির জন্য ছুটি মঞ্জুর করতে আবেদনপত্র লিখুন।

১১ এপ্রিল ২০১৬

প্রধান শিক্ষক

উত্তরা মডেল হাইস্কুল, ঢাকা।

বিষয় : ছুটির জন্য আবেদন।

জনাব,

সবিনয়ে নিবেদন এই যে, আমি আপনার স্কুলের ৯ম শ্রেণির একজন নিয়মিত ছাত্র। আমি গত ২-৪-১৬ থেকে ৫-৪-১৬ তারিখ পর্যন্ত অসুস্থতার কারণে বিদ্যালয়ে উপস্থিত হতে পারিনি।

অতএব, বিনীত প্রার্থনা এই যে, উক্ত কারণে উল্লেখিত দিনগুলো বিদ্যালয়ে অনুপস্থিত থাকার জন্য ছুটি মঞ্জুর করতে আপনার সুআজ্ঞা হয়।

বিনীত

আপনার একান্ত অনুগত ছাত্র

(আরেফিন শুভ)

নবম শ্রেণি, রোল- ৬, বিজ্ঞান শাখা

উত্তরা মডেল হাইস্কুল, ঢাকা।

২. বিনা বেতনে অধ্যয়নের জন্য প্রধান শিক্ষকের নিকট আবেদনপত্র লিখুন।

২২ মার্চ ২০১৬

প্রধান শিক্ষক

মডেল হাইস্কুল, খুলনা।

বিষয় : বিনা বেতনে পড়ার আবেদন।

জনাব,

সবিনয় নিবেদন এই যে, আমি আপনার স্কুলের দশম শ্রেণির একজন নিয়মিত শিক্ষার্থী। গত বার্ষিক পরীক্ষায় আমি প্রথম স্থান অধিকার করে দশম শ্রেণিতে উত্তীর্ণ হয়েছি। আমার বাবা একজন দরিদ্র কৃষক। আমাদের তিন ভাই-বোনের লেখাপড়া ও ভরণ-পোষণ আমার বাবার পক্ষে একেবারেই অসম্ভব। বাবার স্বল্প আয়ে আমাদের সংসার চলে না। তাই আমাকে বিনা বেতনে পড়ার সুযোগ প্রদান করলে বিশেষভাবে উপকৃত হব।

অতএব, বিনীত প্রার্থনা, আমাকে বিনা বেতনে পড়ার ব্যবস্থা গ্রহণ করতে আজ্ঞা হয়।

বিনীত

আপনার একান্ত অনুগত

(নার্গিস সুলতানা)

দশম শ্রেণি, শাখা- বিজ্ঞান, রোল নং- ১

মডেল হাইস্কুল, খুলনা।



৩. 'প্রশংসাপত্র' চেয়ে প্রধান শিক্ষকের নিকট দরখাস্ত।

১০ জুন ২০১৬  
প্রধান শিক্ষক  
মডেল হাইস্কুল, কুমিল্লা।

বিষয় : প্রশংসাপত্রের জন্য আবেদন।

জনাব,

সবিনয় নিবেদন এই যে, আমি আপনার স্কুলের একজন নিয়মিত ছাত্র। ২০১৪ সালে কুমিল্লা বোর্ডের অধীনে অনুষ্ঠিত এসএসসি পরীক্ষায় আমি জিপিএ-৫ পেয়ে উত্তীর্ণ হয়েছি। স্কুলে গত পাঁচ বছর অধ্যয়ন কালে ক্রীড়া ও সাংস্কৃতিক কর্মকাণ্ডে আমি সক্রিয়ভাবে জড়িত ছিলাম। কোনো আইনশৃঙ্খলা বিরোধী কাজের সঙ্গে আমার কোনো সম্পৃক্ততা ছিল না। বর্তমানে আমি ঢাকার স্বনামধন্য একটি সরকারী কলেজে ভর্তি হতে ইচ্ছুক। তাই আমার একটি প্রশংসাপত্র প্রয়োজন। অতএব, অনুগ্রহপূর্বক আমাকে চারিত্রিক ও শিক্ষা বিষয়ক প্রশংসাপত্র প্রদান করতে আপনার একান্ত মর্জি হয়।

বিনীত

আপনার একান্ত অনুগত  
(আরমান সোহেল)  
এসএসসি পরীক্ষায় উত্তীর্ণ ছাত্র  
পরীক্ষার ক্রমিক নং : ১২১, রেজিস্ট্রেশন নম্বর : ২১৩১  
বিজ্ঞান শাখা, মডেল হাইস্কুল, কুমিল্লা।

৪. আপনার বিদ্যালয়ে একটি ক্যান্টিন খোলা প্রয়োজন এ মর্মে প্রধান শিক্ষকের নিকট একখানা দরখাস্ত লিখুন।

২৫ এপ্রিল ২০১৬  
প্রধান শিক্ষক  
আইডিয়াল স্কুল, মতিঝিল, ঢাকা।

বিষয় : ক্যান্টিন স্থাপনের জন্য আবেদন।

জনাব,

বিনীত নিবেদন এই যে, আমরা আপনার বিদ্যালয়ের অনাবাসিক শিক্ষার্থী। প্রতিদিন আমরা অনেক দূর-দূরান্ত থেকে স্কুলে আসি। নানা কারণে বাসা থেকে টিফিন আনা অনেকের পক্ষেই সম্ভব হয় না। তাছাড়া স্কুলের টিফিন পিরিয়ডের স্বল্পতম সময়ে ক্যাম্পাসের বাইরে গিয়ে টিফিন কিনে আনা শিক্ষার্থীদের পক্ষে সম্ভব নয়। এ অবস্থায় স্কুলের ভেতরে একটি ক্যান্টিন স্থাপন করা হলে শিক্ষার্থীদের এ সমস্যার নিরসন হতে পারে।

অতএব, মহোদয়ের কাছে প্রার্থনা যে, শিক্ষার্থীদের বৃহত্তর প্রয়োজনের কথা বিবেচনা করে স্কুল ক্যাম্পাসে একটি ক্যান্টিন স্থাপনের ব্যবস্থা করলে আমরা বিশেষভাবে উপকৃত হব।

বিনীত

অনাবাসিক শিক্ষার্থীবৃন্দ  
আইডিয়াল স্কুল, মতিঝিল, ঢাকা।





৫. শিক্ষা সফরে যাওয়ার অনুমতি প্রার্থনা করে বিদ্যালয়ের প্রধান শিক্ষকের কাছে আবেদনপত্র লিখুন।

২০ ফেব্রুয়ারি ২০১৬

প্রধান শিক্ষক

উত্তরা হাইস্কুল

ঢাকা।

বিষয় : শিক্ষা সফরে যাওয়ার প্রয়োজনীয় অর্থ ও অনুমতির জন্য আবেদন।

জনাব,

বিনীত নিবেদন এই যে, আমরা আপনার স্কুলের দশম শ্রেণির ছাত্র/ছাত্রী। আগামী মাসের শেষ সপ্তাহে আমরা কক্সবাজারে শিক্ষাসফরে যেতে আগ্রহী। প্রকৃতির কোলাহলমুক্ত পরিবেশে সমুদ্রের বিশালতাকে আমরা খুব কাছ থেকে দেখতে চাই। এ প্রাকৃতিক মনোরম পরিবেশ অবলোকনের মাধ্যমে আমাদের মনপ্রাণ আনন্দে ভরে যাবে। সাথে সাথে আমরা প্রকৃতি ও জীবন সম্পর্কে বাস্তব অভিজ্ঞতা লাভ করব। এজন্য আমাদের আর্থিক সহযোগিতা প্রয়োজন।

অতএব, মহোদয়ের নিকট আমাদের সবিনয় নিবেদন, আমাদের শিক্ষাসফরে যাওয়ার অনুমতি ও প্রয়োজনীয় অর্থ বরাদ্দ বরাদ্দ করতে আপনার সুআজ্ঞা হয়।

বিনীত

বিদ্যালয়ের দশম শ্রেণির

শিক্ষার্থীবৃন্দ।



## সংবাদপত্রে প্রকাশের জন্য পত্র

১. ডাকঘর স্থাপনের প্রয়োজনীয়তা উল্লেখ করে সংবাদপত্র প্রকাশের জন্য পত্র রচনা করুন।

০২ এপ্রিল ২০১৬

সম্পাদক,

দৈনিক ইত্তেফাক

১ রামকৃষ্ণ মিশন রোড, ঢাকা-১২০৩।

বিষয় : সংযুক্ত পত্র প্রকাশের জন্য আবেদন।

জনাব,

আপনার বহুল প্রচারিত 'দৈনিক ইত্তেফাক' পত্রিকায় জনগুরুত্বপূর্ণ পত্রটি প্রকাশ করলে বিশেষভাবে বাঞ্ছিত হব।

নিবেদক

হাকিম আসিফ

আগরপুর, কিশোরগঞ্জ।

### ডাকঘর চাই

কিশোরগঞ্জ জেলার কুলিয়ারচর থানার অন্তর্গত আগরপুর একটি ঘনবসিতপূর্ণ গ্রাম। এ গ্রামে প্রায় ১২ হাজার লোকের বসবাস। এ গ্রামের লোক চাকরি, ব্যবসা, লেখাপড়া প্রভৃতি কাজে ঢাকাসহ পৃথিবীর বিভিন্ন দেশে কর্মরত। ফলে প্রতিদিনই এ গ্রামে শত শত চিঠি, টেলিগ্রাম, মানি-অর্ডার আসছে এবং অনুরূপ সংখ্যক বাইরে যাচ্ছে। কিন্তু দুঃখের বিষয় এখানে কোনো ডাকঘর নেই। ফলে গ্রামবাসীকে তিন মাইল দূরে সরারচর ডাকঘরে যেতে হয়। একটা ডাকঘরের অভাবে আগরপুর গ্রামের বিশাল জনগোষ্ঠী নিদারুণ কষ্ট পাচ্ছে। তাই এ গ্রামে একটি ডাকঘর স্থাপন অপরিহার্য হয়ে পড়েছে।

ডাক বিভাগের উর্ধ্বতন কর্তৃপক্ষের কাছে আকুল আবেদন, কিশোরগঞ্জ জেলার আগরপুর গ্রামে একটা ডাকঘর স্থাপন করা হোক। এতে গ্রামের জনসাধারণ যেমন উপকৃত হবে তেমনি সরকারের রাজস্ব আয় বাড়বে।

নিবেদক

আগরপুর গ্রামবাসীর পক্ষে

হাকিম আসিফ

আগরপুর, কিশোরগঞ্জ।



২. দাতব্য চিকিৎসালয় স্থাপনের প্রয়োজনীয়তা বর্ণনা করে সংবাদপত্রে একটি চিঠি লিখুন।

০২ এপ্রিল ২০১৬

সম্পাদক,

দৈনিক জনকণ্ঠ

মতিঝিল, ঢাকা।

বিষয় : সংযুক্ত পত্রটি প্রকাশের জন্য আবেদন।

জনাব,

আপনার বহুল প্রচারিত ‘দৈনিক জনকণ্ঠ’ পত্রিকায় নিম্নোক্ত পত্রটি প্রকাশের বিনীত অনুরোধ জানাচ্ছি।

বিনীত

আশফাক চৌধুরী

রামনগর, ভোলা।

#### রামনগরে দাতব্য চিকিৎসালয় স্থাপনের আবেদন

ভোলা জেলার রায়পুরা থানার অন্তর্গত রামনগর একটি জনবহুল গ্রাম। এখানে লোকসংখ্যা প্রায় দশ হাজার। কিন্তু দুঃখের বিষয় এ গ্রামে কোন ডাক্তার নেই, কোন চিকিৎসালয়ও নেই। ডাক্তারের কাছে যেতে হলে ২০/৩০ মাইল দূরে যেতে হয়। ফলে প্রতি বছর জন্ডিস, কলেরা, আমাশয়, জ্বর প্রভৃতি রোগে বহু মানুষ অকালে প্রাণ হারায়। বিনা চিকিৎসার কারণে এখানে মৃত্যুর হার অনেক বেশি। তাই এই গ্রামে একটি সরকারি দাতব্য চিকিৎসালয় স্থাপন অত্যাবশ্যিক হয়ে পড়েছে।

অতএব, সংশ্লিষ্ট কর্তৃপক্ষের নিকট এলাকাবাসীর আকুল আবেদন এই যে, অনতিবিলম্বে এই গ্রামে একটি দাতব্য চিকিৎসালয় স্থাপন করে গ্রামের দুস্থ ও গরীব মানুষদের অকাল মৃত্যুর হাত থেকে রক্ষা করলে চির কৃতজ্ঞ থাকব।

নিবেদক

এলাকাবাসীর পক্ষে

আশফাক চৌধুরী

রামনগর, ভোলা।



৩. আপনার এলাকার বন্যার্তদের সাহায্যের জন্য সংবাদপত্রে একটি চিঠি লিখুন।

০২ ফেব্রুয়ারি ২০১৭  
সম্পাদক,  
দৈনিক সংবাদ, ঢাকা।

বিষয় : সংযুক্ত পত্রটি প্রকাশের জন্য আবেদন।

জনাব,  
আপনার বহুল প্রচারিত 'দৈনিক সংবাদ' পত্রিকায় নিম্নোক্ত পত্রটি প্রকাশের বিনীত অনুরোধ জানাচ্ছি।  
নিবেদক  
আমান বাশার  
বাজনাব, নরসিংদী।

#### বন্যার্তদের জন্য সাহায্য চাই

গত ১২ জুলাই থেকে নরসিংদী জেলার বেলাব থানার বাজনাব গ্রামে সর্বত্র বন্যার পানি থৈ থৈ করছে। চারিদিকে শুধু পানি আর পানি। ভয়াবহ বন্যায় এ গ্রামের জনজীবন বিপন্ন। পুরাতন ব্রহ্মপুত্র নদের জোয়ার এবং অবিরাম বর্ষণের ফলে সৃষ্ট বন্যা মানুষ এবং গবাদি পশুর জীবন কেড়ে নিচ্ছে। হাজার হাজার মানুষ পানিবন্দী। মানুষ এবং গবাদিপশু একসাথে আশ্রয়কেন্দ্রে বসবাস করছে। ফলে খাদ্য এবং বিশুদ্ধ পানীয় জলের অভাবে দেখা দিয়েছে ডায়রিয়া, আমাশয়, জন্ডিস, যা মহামারী আকারে ছড়াচ্ছে। তাই অত্র এলাকায় অবিলম্বে খাদ্য, পানীয় জল ও চিকিৎসা দরকার।

অতএব, অত্র এলাকার বন্যাদুর্গত মানুষদের প্রাণ রক্ষার্থে অবিলম্বে খাদ্য, বিশুদ্ধ পানীয় জল এবং চিকিৎসা সরঞ্জাম প্রেরণের জন্য সংশ্লিষ্ট কর্তৃপক্ষের নিকট আকুল আবেদন জানাচ্ছি।

নিবেদক  
এলাকাসবাসীর পক্ষে  
আমান বাশার  
বাজনাব, নরসিংদী।



৪. আপনার এলাকায় বিশুদ্ধ পানীয় জলের অভাবের কথা জানিয়ে সংবাদপত্র সম্পাদককে একটি চিঠি লিখুন।

১১ মার্চ ২০১৭  
সম্পাদক,  
দৈনিক ইনকিলাব  
২/এ আর.কে. মিশন রোড  
ঢাকা।

বিষয় : সংযুক্ত পত্রটি প্রকাশের জন্য আবেদন।

জনাব,  
আপনার বহুল প্রচারিত ‘দৈনিক ইনকিলাব’ পত্রিকায় এইসঙ্গে প্রেরিত পত্রটি প্রকাশ করলে কৃতার্থ হব।  
নিবেদক  
মতিন রহমান  
হারিয়াকান্দা, কিশোরগঞ্জ।

#### হারিয়াকান্দা গ্রামে বিশুদ্ধ পানীয় জল চাই

কিশোরগঞ্জ জেলার কুলিয়ারচর থানার অন্তর্গত হারিয়াকান্দা একটি জনবহুল গ্রাম। এ গ্রামে প্রায় আট হাজার লোকের বসবাস। গ্রামটি যোগাযোগের দিক থেকে বেশ পিছিয়ে। এ গ্রামে বিশুদ্ধ পানীয় জলের তীব্র অভাব। এখানে পুকুরের সংখ্যা খুবই কম। যেগুলো আছে, খরা মৌসুমে সেগুলো শুকিয়েও যায়। গ্রামে টিউবওয়েলের সংখ্যাও খুব কম। ফলে বিশুদ্ধ পানীয় জলের অভাবে প্রতি বছর বহু লোকের মৃত্যু হয়। আর ডায়রিয়া, জন্ডিস, টাইফয়েড— এ রোগগুলো এ গ্রামের মানুষের নিত্যসঙ্গী। তাই গ্রামবাসীকে অকাল মৃত্যু ও মহামারী রোগের হাত থেকে বাঁচানোর জন্য অবিলম্বে এলাকায় গভীর নলকূপ বসানো দরকার।

অতএব, অনতিবিলম্বে আমাদের গ্রামে কমপক্ষে ছয়টি গভীর নলকূপ বসিয়ে এই অকাল মৃত্যু রোধের জন্য সংশ্লিষ্ট কর্তৃপক্ষের নিকট আকুল আবেদন জানাচ্ছি।

নিবেদক  
এলাকাবাসীর পক্ষে  
মতিন রহমান  
হারিয়াকান্দা, কিশোরগঞ্জ।



৫. আপনার গ্রামে একটি প্রাথমিক বিদ্যালয় স্থাপনের প্রয়োজনীয়তা উল্লেখ করে সংবাদপত্রে একটি চিঠি লিখুন।

১৬ এপ্রিল ২০১৭  
সম্পাদক,  
দৈনিক সমকাল  
১৩৬ তেজগাঁও শিল্প এলাকা  
ঢাকা।

বিষয় : সংযুক্ত পত্রটি প্রকাশের জন্য আবেদন।

জনাব,  
আপনার বহুল প্রচারিত 'দৈনিক সমকাল' পত্রিকায় নিম্নলিখিত পত্রটি প্রকাশ করলে বিশেষভাবে বাধিত হব।  
নিবেদক  
মাসুদ চৌধুরী  
রামদী, কিশোরগঞ্জ।

#### প্রাথমিক বিদ্যালয় চাই

কিশোরগঞ্জ জেলার কুলিয়ারচর থানার অন্তর্গত রামদী একটি জনবহুল গ্রাম। এ গ্রামে প্রায় ১২ হাজার লোকের বসবাস। স্কুলগামী ছেলেমেয়ের সংখ্যাও কয়েক হাজার। কিন্তু অত্যন্ত দুঃখের বিষয় এই যে, এই গ্রামে কোনো প্রাথমিক বিদ্যালয় নেই। শিশু-কিশোরদেরকে স্কুলে যেতে হলে প্রায় ৪ কিলোমিটার পথ হাঁটতে হয়। ছোট ছোট শিশুদের পক্ষে এতদূর পথ আসা-যাওয়া করে লেখাপড়া করা মোটেই সম্ভব নয়। তাই উক্ত গ্রামে একটি সরকারি প্রাথমিক বিদ্যালয় স্থাপন করা অতি আবশ্যিক।

অতএব, সংশ্লিষ্ট কর্তৃপক্ষের নিকট সবিনয় নিবেদন এই যে, খুব শীঘ্রই এই গ্রামে একটি সরকারি প্রাথমিক বিদ্যালয় স্থাপন করে গ্রামের ছেলেমেয়েদের শিক্ষার পথ সুগম করে বাধিত করবেন।

নিবেদক  
এলাকাসীরা পক্ষে  
মাসুদ চৌধুরী  
রামদী, কিশোরগঞ্জ।



## মানপত্র ও স্মারকলিপি

১. আপনার স্কুলের প্রধান শিক্ষকের অবসর গ্রহণ উপলক্ষে বিদায় অভিনন্দনপত্র লিখুন।

তারিখ : ১১.০৪.২০১৭

উত্তরা হাইস্কুলের মাননীয় প্রধান শিক্ষক  
শ্রদ্ধেয় অমিত হাসান সাহেবের অবসর গ্রহণ উপলক্ষে  
শ্রদ্ধাঞ্জলি

হে মহান শিক্ষাগুরু,

আমাদের সশ্রদ্ধ চিত্তের অভিনন্দন গ্রহণ করুন। আমাদের মন-প্রাণ আজ ব্যথিত। অতীতের এক আলোকময় দিনে একনিষ্ঠ কর্মস্পৃহা নিয়ে আপনি এই স্কুলে যোগ দিয়েছিলেন। সুদীর্ঘকাল আপনার ভালবাসা, কর্মনিষ্ঠা, আন্তরিকতা ছিল আমাদের চলার পথের পাথেয়। আর অসংখ্য শিক্ষার্থীর জীবনকে আপনি করেছেন আলোকিত। তাই আজ আপনার বিদায়লগ্নে শুধুই মনে পড়ছে বিদায়ের বাণী-

“যেতে নাহি দিব হয়/তবু যেতে দিতে হয়, তবু চলে যায়।”

হে কর্মবীর,

আপনার কাজ থেকে আমরা কোনদিন কোন কিছুই অভাববোধ করিনি। সুদীর্ঘ কর্মজীবনে আপনি ছিলেন আদর্শ ও ন্যায়ের প্রতীক। উত্তরা হাইস্কুলের উত্তরোত্তর সুনাম বৃদ্ধিতে আপনি রেখেছেন অনন্য অবদান। স্কুলের সার্বিক পরিচালনায়, শিক্ষাদান, সাংস্কৃতিক কার্যক্রমে আপনি ছিলেন আমাদের অভিভাবক। একজন আদর্শ শিক্ষক হিসেবে আপনাকে আমরা কোনদিন ভুলব না।

হে বিদায়ী সাধক,

পেয়ে হারানোর ব্যথায় আজ আমরা ভারাক্রান্ত। তাই আপনাকে বিদায় দিতে কান্নায় আমাদের হৃদয় ভেঙ্গে যাচ্ছে। আপনাকে ঘিরে অনেক সুখের স্মৃতি বার বার স্মৃতিপটে ভাসছে। বিদায়লগ্নে আমাদের প্রার্থনা, আপনি আমাদের অনিচ্ছাকৃত ক্রটিগুলো ক্ষমাসুন্দর দৃষ্টিতে দেখবেন। জীবনের নিয়মে আপনি এই স্কুল থেকে অবসর নিলেও আমাদের অন্তরের মণিকোঠায় থাকবেন চিরদিন অম্লান।

প্রার্থনা করি, আপনি দীর্ঘায়ু হোন। আপনার অনাগত দিনগুলো সুস্থ, সুন্দরভাবে কাটুক, এ আমাদের আন্তরিক কামনা।

আপনার স্নেহধন্য

ছাত্রবৃন্দ

উত্তরা হাইস্কুল, ঢাকা।



২. নতুন প্রধান শিক্ষকের আগমন উপলক্ষে সংবর্ধনা জানিয়ে মানপত্র।

০৮ মার্চ ২০১৭

কিশোরগঞ্জ

কুলিয়ারচর মডেল হাইস্কুলের নবাগত প্রধান শিক্ষক  
জনাব আকবর হোসেনের যোগদান উপলক্ষে  
শ্রদ্ধা-অভিনন্দন।

হে নবাগত শিক্ষাগুরু,

আপনার আগমনে কুলিয়ারচর মডেল হাইস্কুলটি আজ আনন্দে উদ্বেলিত। আপনার মত একজন সুদক্ষ ও প্রজ্ঞাবান শিক্ষকের পদার্পণে আমরা ধন্য, গৌরবান্বিত। আর আপনার হাতের ছোঁয়ায় আমাদের জীবন হবে আলোকিত। আপনি আমাদের প্রাণঢালা অভিনন্দন গ্রহণ করুন।

হে জ্ঞানতাপস,

আপনার কর্মনিষ্ঠা, আন্তরিকতা, ভালবাসা আমাদের অন্তরে জ্বালাবে জ্ঞানের আলো। সেই আলোয় আলোকিত হয়ে আমরা দেশকে গড়ব। এই স্কুলের সুনাম অক্ষুণ্ণ রাখতে আপনার মতো একজন যোগ্য ব্যক্তির নেতৃত্বের প্রয়োজন। আমাদের কামনা, আপনার অভিভাবকত্ব এই স্কুলটিকে নিয়ে যাবে গৌরব ও খ্যাতির শীর্ষে।

হে মহান বীর,

আমাদের বিশ্বাস, আপনার যোগ্য নেতৃত্ব হবে আমাদের চলার পথের পাথের। শিক্ষাজ্ঞান হবে আরো প্রাণবন্ত। আপনার স্নেহছায়া জ্ঞানের দীপ্তিতে উজ্জ্বল হব আমরা। নীতি ও আদর্শের প্রশ্নে অবিচল থেকে আমাদেরকে এগিয়ে নিয়ে যাবেন এ আমাদের প্রত্যাশা। এ প্রত্যাশা নিয়েই আমরা আজ আপনাকে বরণ করে নিচ্ছি।

প্রার্থনা করি, আপনি দীর্ঘায়ু হোন। আপনার চলার পথ হোক কুসুম-কোমল।

আপনার গুণমুগ্ধ

ছাত্রবৃন্দ

কুলিয়ারচর মডেল হাইস্কুল

কিশোরগঞ্জ।





৩. খ্যাতিমান কবি বা সাহিত্যিকের আগমন উপলক্ষে অভিনন্দনপত্র রচনা করুন।

১০ জুন ২০১৭

নারায়ণগঞ্জ।

সোনারগাঁ মডেল স্কুলে নন্দিত কথাসাহিত্যিক  
মুহাম্মদ জাফর ইকবালের আগমানে  
হৃদয়োঃ শ্রদ্ধার্ঘ্য

হে মহান অতিথি,

প্রাকৃতিক শোভা, প্রাচীন স্থাপত্যের নিদর্শন, বাংলার বারভূঁইয়ার অন্যতম বীর ঈশা খাঁর স্মৃতি বিজড়িত সোনারগাঁ আজ আপনার পদধূলিতে ধন্য। ঐতিহ্যবাহী এই অঞ্চলের শিক্ষা প্রতিষ্ঠানে আপনার আগমানে আমরা আনন্দিত, উচ্ছ্বসিত। আপনি আমাদের অভিনন্দন গ্রহণ করুন।

হে বরণ্য কথাসিঙ্গী,

কথাসাহিত্যিক হিসেবে আপনার জনপ্রিয়তা আকাশস্পর্শী। সায়েল ফিকশন ও কিশোরজীবন রূপায়ণে আপনার লেখনীর শৈল্পিক পাণ্ডিত্য আমাদেরকে কল্পনার জগতে নিয়ে যায়। আপনার লেখা আমাদেরকে বই পড়ার আনন্দ দেয়। তাই আজ আমরা আপনাকে আমাদের মাঝে পেয়ে অভিভূত ও গর্বিত।

হে মহান শিক্ষাবিদ,

আপনার মত এই স্কুলে একজন মহান শিক্ষাগুরুর আগমন চিরস্মরণীয় হয়ে থাকবে। বর্তমান প্রজন্মকে আলোকিত মানুষ, সৃজনশীল লেখার পাশাপাশি কম্পিউটার, গণিত ও বিজ্ঞান শিক্ষায় আপনার অবদান ইতিহাসের পাতায় স্বর্ণাক্ষরে লেখা থাকবে। আপনি দীর্ঘজীবী হোন। আপনার বলিষ্ঠ লেখনী বর্তমান প্রজন্মকে সত্যানুসন্ধানের পথ দেখাবে, আপনার সাহিত্যকর্ম আমাদের জ্ঞানের পরিধি প্রসারিত করবে- এই আমাদের একান্ত কামনা।

আপনার গুণমুগ্ধ

ছাত্রছাত্রীবন্দ

সোনারগাঁ মডেল স্কুল

নারায়ণগঞ্জ।



## ৪. একজন মন্ত্রীর আগমন উপলক্ষে অভিনন্দনপত্র রচনা করুন।

০২ ফেব্রুয়ারি ২০১৭

নারায়ণগঞ্জ।

গণপ্রজাতন্ত্রী বাংলাদেশ সরকারের মাননীয় শিক্ষামন্ত্রী  
জনাব নূরুল ইসলাম নাহিদ-এর আগমন উপলক্ষে  
মোহনগঞ্জ হাইস্কুলের পক্ষ থেকে  
প্রাণঢালা অভিনন্দন

হে জন দরদি,

আপনার শুভাগমনে মোহনগঞ্জ হাইস্কুলটি আজ আনন্দে উদ্বেলিত। আমাদের মাঝে আপনার মত গুণীজনকে পেয়ে আমরা ধন্য ও আনন্দিত। আপনি আমাদের প্রাণঢালা অভিনন্দন গ্রহণ করুন।

হে শিক্ষা বন্ধু,

বর্তমান শিক্ষাব্যবস্থায় আপনার অবদান অনস্বীকার্য। আপনার নিরলস কর্মপ্রচেষ্টায় শিক্ষাব্যবস্থায় এসেছে বৈপ্লবিক পরিবর্তন। সৃজনশীল পদ্ধতিতে পাঠদান পদ্ধতির ব্যবহার ক্ষুদ্রে শিক্ষার্থীদের কাছে বেশ আকর্ষণীয় হয়ে উঠেছে। সারাবিশ্ব আজ আপনার কাজের প্রশংসায় পঞ্চমুখ।

হে দেশপ্রেমিক,

নানা সমস্যায় জর্জরিত আমাদের এ স্কুলটি। তাই আপনার কাছে আমাদের চাওয়া অনেক। আলোকিত সমাজ তথা শিক্ষাব্যবস্থায় আপনার উন্নয়নের কথা শুনে আমরা আশাবাদী হয়ে আছি। তাই অত্র স্কুলের কিছু সমস্যার সমাধানকল্পে আপনার সদয় দৃষ্টি আকর্ষণ করছি।

- \* **বিজ্ঞানাগারের অভাব**— একটি মানসম্মত বিজ্ঞানাগার চাই। তাতে বিজ্ঞান শাখার শিক্ষার্থীরা সুষ্ঠুভাবে তাদের বিজ্ঞান ক্লাশ করতে পারে।
- \* **স্কুল লাইব্রেরির অভাব**—কোনো লাইব্রেরি না থাকায় এ স্কুলের অধ্যয়নরত তিন হাজার ছাত্র-ছাত্রীর পড়াশুনা মারাত্মকভাবে বিঘ্নিত হচ্ছে। তাই একটি লাইব্রেরি স্থাপনের জন্য বিশেষভাবে অনুরোধ করছি।
- \* **প্রয়োজনীয় শিক্ষা উপকরণ ও সাহিত্য**— সাংস্কৃতিক চর্চার সরঞ্জামাদির অভাব রয়েছে। তাই উক্ত সরঞ্জামাদি ক্রয়ের জন্য অর্থ বরাদ্দের ব্যাপারে আপনার সহযোগিতা কামনা করছি।
- \* **বৈদ্যুতিক পাখা**— প্রতিটি শ্রেণীকক্ষে বৈদ্যুতিক পাখা লাগানোর জন্য প্রয়োজনীয় অর্থ বরাদ্দের সহযোগিতা কামনা করছি।

আমাদের প্রত্যাশা, উল্লেখিত সমস্যাগুলো বিশেষভাবে বিবেচনা করে অবিলম্বে সমস্যাসমূহের সমাধান করে মোহনগঞ্জ হাইস্কুলের শিক্ষার সুষ্ঠু পরিবেশ নিশ্চিত করা হবে। আপনি দীর্ঘজীবী হোন। আলোকিত সমাজ নির্মাণে আপনার অবদান চিরস্মরণীয় হয়ে থাকুক এটাই আমাদের একান্ত কামনা।

আপনার গুণমুগ্ধ

ছাত্রবৃন্দ

মোহনগঞ্জ হাই স্কুল

নারায়ণগঞ্জ।



## আমন্ত্রণ বা নিমন্ত্রণপত্র

১. বিজয় উদ্যাপন উপলক্ষে আমন্ত্রণপত্র লিখুন।

সুধী

আগামী ১৬ই ডিসেম্বর ২০১৬, মহান বিজয় দিবস উদ্যাপন উপলক্ষে আমাদের স্কুলে এক আলোচনা সভার আয়োজন করা হয়েছে। উক্ত অনুষ্ঠানে প্রধান অতিথি হিসেবে উপস্থিত থাকবেন এলাকার বিশিষ্ট মুক্তিযোদ্ধা বীরউত্তম বদরুল আলম। এছাড়া উক্ত অনুষ্ঠানে ছাত্র-শিক্ষকসহ স্থানীয় গণ্যমান্য ব্যক্তিবর্গ উপস্থিত থাকবেন। অনুষ্ঠানে আপনি আমন্ত্রিত।

তারিখ : ১০ই ডিসেম্বর ২০১৬  
কুলিয়ারচর।

বিনীত  
কুলিয়ারচর পাইলট স্কুলের  
শিক্ষার্থীদের পক্ষে  
কবির হোসেন  
কুলিয়ারচর, কিশোরগঞ্জ।

### অনুষ্ঠান সূচি

|                |   |                                 |
|----------------|---|---------------------------------|
| সকাল ৮.৩০ মি.  | : | র্যালি                          |
| সকাল ৯.০০টা    | : | সম্মানিত অতিথিবৃন্দের আসন গ্রহণ |
| সকাল ৯.৩০ মি.  | : | আলোচনা সভা                      |
| সকাল ১১.০০টা   | : | সাংস্কৃতিক অনুষ্ঠান             |
| সকাল ১২.৩০ মি. | : | সমাপ্তি।                        |

২. রবীন্দ্র জয়ন্তী উদ্যাপন উপলক্ষে আমন্ত্রণপত্র লিখুন।

সুধী

আগামী ২৫শে বৈশাখ ১৪২৩, ৭ই মে ২০১৬, শনিবার, বিশ্বকবি রবীন্দ্রনাথ ঠাকুরের জন্মবার্ষিকী পালিত হবে। এ উপলক্ষে ঐদিন সকাল দশটায় উত্তরা মডেল হাইস্কুল মিলনায়তনে এক আলোচনা সভা ও সাংস্কৃতিক অনুষ্ঠানের আয়োজন করা হয়েছে। অনুষ্ঠানে আপনি আমন্ত্রিত।

তারিখ : ২২ শে মে ২০১৬  
উত্তরা, ঢাকা

বিনীত  
উত্তরা মডেল হাইস্কুলের  
ছাত্রদের পক্ষে  
হাসান রেজা  
সাংস্কৃতিক সম্পাদক।

### অনুষ্ঠান সূচি

|                |   |                     |
|----------------|---|---------------------|
| সকাল ১০.০০টা   | : | অতিথিদের আসন গ্রহণ  |
| সকাল ১০.১০ মি. | : | আলোচনা সভা          |
| সকাল ১১.০০টা   | : | সাংস্কৃতিক অনুষ্ঠান |
| সকাল ১২.৩০ মি. | : | সমাপ্তি।            |



### ৩. বার্ষিক মিলাদ মাহফিল উদযাপন উপলক্ষে আমন্ত্রণপত্র লিখুন।

সুধী

শুভেচ্ছা নিবেন।

আগামী ২রা ফেব্রুয়ারী ২০১৬, শনিবার সকাল ৮.০০টায় কিশোরগঞ্জ বালিকা উচ্চ বিদ্যালয় মিলনায়তনে স্কুলের বার্ষিক মিলাদ-মাহফিলের আয়োজন করা হয়েছে। অনুষ্ঠানে বিশেষ অতিথি হিসেবে উপস্থিত থাকবেন মাওলানা মোঃ আতিকুর রহমান।

অনুষ্ঠানে আপনাকে সাদর আমন্ত্রণ জানাচ্ছি।

তারিখ : ৩০ জানুয়ারি ২০১৬

কিশোরগঞ্জ

বিনীত

কিশোরগঞ্জ বালিকা উচ্চ বিদ্যালয়ের  
শিক্ষার্থীবৃন্দ

#### অনুষ্ঠান সূচি

|                |   |                                |
|----------------|---|--------------------------------|
| সকাল ৮.০০টা    | : | অতিথিদের আসন গ্রহণ             |
| সকাল ৮.১৫ মি.  | : | পবিত্র ধর্মগ্রন্থসমূহ থেকে পাঠ |
| সকাল ৮.৩০ মি.  | : | বিশেষ অতিথির বক্তব্য           |
| সকাল ৮.৪০ মি.  | : | হামদ ও নাত                     |
| সকাল ৯.৩০ মি.  | : | মিষ্টি বিতরণ                   |
| সকাল ১০.৩০ মি. | : | সমাপ্তি।                       |

### ৪. নজরুল জয়ন্তী উদযাপন উপলক্ষে আমন্ত্রণপত্র লিখুন।

২০শে মে ২০১৭

কিশোরগঞ্জ

সুধী

আগামী ২৫শে মে ২০১৭, ১১ই জ্যেষ্ঠ ১৪২৩, শনিবার, আমাদের জাতীয় কবি কাজী নজরুল ইসলামের জন্মবার্ষিকী উপলক্ষে এক বিশেষ অনুষ্ঠানের আয়োজন করা হয়েছে। অনুষ্ঠানে প্রধান অতিথি হিসাবে উপস্থিত থাকবেন বিশিষ্ট নজরুল গবেষক অধ্যাপক রফিকুল ইসলাম। এ উপলক্ষে ঐদিন সকাল দশটায় আগরপুর হাইস্কুল মিলনায়তনে এক আলোচনা সভা ও সাংস্কৃতিক অনুষ্ঠানের আয়োজন করা হয়েছে।

অনুষ্ঠানে আপনাকে সাদর আমন্ত্রণ জানাচ্ছি।

বিনীত

আগরপুর হাইস্কুলের

শিক্ষার্থীদের পক্ষে

তৌহিদ রহমান

সাংস্কৃতিক সম্পাদক।

#### অনুষ্ঠান সূচি

|                |   |                              |
|----------------|---|------------------------------|
| সকাল ৯:৩০ মি.  | : | অতিথিদের আসন গ্রহণ           |
| সকাল ৯:৪০ মি.  | : | আলোচনা সভা                   |
|                |   | আলোচক : অধ্যাপক রফিকুল ইসলাম |
| সকাল ১০:৪০ মি. | : | সাংস্কৃতিক অনুষ্ঠান          |
| সকাল ১২:৩০ মি. | : | সমাপ্তি।                     |



## বাণিজ্যিক বা ব্যবসায়িক পত্র

১. ভি.পি.পি করে বই পাঠানোর জন্য পুস্তক ব্যবসায়ীর নিকট পত্র করুন।

১১ ফেব্রুয়ারি ২০১৭

কর্মাধ্যক্ষ

তাম্রলিপি,

৩৮/২ক, বাংলাবাজার, ঢাকা।

জনাব,

সালাম রইল। নিম্নলিখিত বইগুলো অতিসত্বর নিম্ন ঠিকানায় ভি.পি.পি যোগে পাঠালে বিশেষভাবে উপকৃত হব। বই প্রাপ্তির সঙ্গেসঙ্গে মূল্য প্রেরণের নিশ্চয়তা রইল। অনুগ্রহ করে শীঘ্রই বইগুলো পাঠানোর জন্য সবিনয় অনুরোধ জানাচ্ছি।

আপনার বিশ্বস্ত

আপেল মাহমুদ

নবম শ্রেণি (বিজ্ঞান)

রোল-১

উত্তরা মডেল হাইস্কুল

ঢাকা।

বইয়ের তালিকা :

১. বাংলাপিডিয়া (১০ খণ্ড) এশিয়াটিক সোসাইটি অব বাংলাদেশ, ঢাকা।
২. ব্যবহারিক বাংলা অভিধান, বাংলা একাডেমী, ঢাকা।
৩. বেসিক আলী (৭ খণ্ড), পাঞ্জেরী পাবলিকেশনস লি. ঢাকা।

|                                                        |             |                                                   |
|--------------------------------------------------------|-------------|---------------------------------------------------|
|                                                        |             | ডাক টিকেট                                         |
| প্রেরক<br>আপেল মাহমুদ<br>উত্তরা মডেল হাই স্কুল<br>ঢাকা | কর্মাধ্যক্ষ | প্রাপক,<br>তাম্রলিপি,<br>৩৮/২ক, বাংলাবাজার, ঢাকা। |



২. মালামাল রপ্তানির জন্য অন্য কোনো দেশের কোম্পানির সাথে যোগাযোগ স্থাপনের পত্র।

৪ এপ্রিল ২০১৭

কর্মাধ্যক্ষ  
সোনার বাংলা  
পশ্চিম বঙ্গ  
কলকাতা

জনাব,

শুভেচ্ছা রইল। আনন্দের সাথে জানাচ্ছি যে, 'তাম্রলিপি' প্রকাশনী, ৩৮/২ক, বাংলাবাজার, ঢাকা-১১০০, বাংলাদেশ থেকে বাংলাভাষায় প্রকাশিত গল্প, উপন্যাস, ভ্রমণ কাহিনী, বিজ্ঞান, ইতিহাস আপনার কোম্পানির মাধ্যমে পশ্চিমবঙ্গে ব্যবসায়িক প্রসারে আগ্রহী।

আপনার অনুমতি পেলে আমি গ্রন্থতালিকা ও নিয়মাবলি পাঠাব। এ বিষয়ে আপনার মতামত জানিয়ে দ্রুত চিঠি লিখার অনুরোধ করছি।

শুভেচ্ছাসহ  
প্রধান ব্যবস্থাপক  
তাম্রলিপি প্রকাশনী  
৩৮/২ক, বাংলাবাজার  
ঢাকা-১১০০।

ডাক টিকেট

প্রেরক  
প্রধান ব্যবস্থাপক  
তাম্রলিপি প্রকাশনী  
বাংলাবাজার, ঢাকা

প্রাপক,  
সোনার বাংলা  
পশ্চিম বঙ্গ  
কলকাতা